

Scéimeanna Teanga

1. [Cad is scéim teanga ann?](#)
2. [Cén chaoi a ndéantar scéimeanna teanga a aontú?](#)
3. [Cé mhéad scéim teanga a bhí daingnithe ag deireadh 2009?](#)
4. [Cá bhfuil eolas ar fáil faoi na scéimeanna teanga?](#)

1. Cad is scéim teanga ann?

Tá sé mar chuspóir leis na scéimeanna teanga méadú a dhéanamh ar líon agus ar chaighdeán na seirbhísí Gaeilge atá ar fáil ó chomhlachtaí stáit thar thréimhse ama. Fanann na scéimeanna reachtúla i bhfeidhm ar feadh tréimhse trí bliana nó go mbíonn scéim nua daingnithe ag an Aire Gnóthaí Pobail, Comhionannais agus Gaeltachta leis an gcomhlacht poiblí.

Tugann na scéimeanna teanga gealltanais reachtúla i leith na socruithe faoina bhforbraíonn comhlachtaí poiblí a gcuid seirbhísí trí mheán na Gaeilge ar bhealach céimnithe. Is faoin Aire atá sé scéimeanna a aontú le comhlachtaí poiblí faoi réir alt 11 d'Acht na dTeangacha Oifigiúla 2003.

Nuair atá scéim daingnithe ag an Aire, tá dualgas ar an gcomhlacht poiblí í a chur i bhfeidhm. Cuireann an tAire cóip de gach scéim atá daingnithe chuig Oifig an Choimisinéara Teanga, áit a ndéantar monatóireacht ar chur i bhfeidhm na scéimeanna.

[Ar ais](#)

2. Cén chaoi a ndéantar scéimeanna teanga a aontú?

Is iad an comhlacht poiblí agus an Roinn Gnóthaí Pobail, Comhionannais agus Gaeltachta a chomhaontaíonn an scéim teanga agus níl aon bhaint ag Oifig an Choimisinéara Teanga leis an bpróiseas seo.

Chun cuidiú le comhlachtaí poiblí agus iad i mbun scéim teanga a ullmhú, tá treoirlínte reachtúla réitithe ag an Roinn Gnóthaí Pobail, Comhionannais agus Gaeltachta agus tá siad ar fáil ar www.coimisineir.ie/sceimeanna.

De réir na reachtaíochta, tugtar tréimhse 6 mhí do chomhlacht poiblí chun dréachtscéim a ullmhú ón am a dtreoraíonn an tAire dóibh a leithéid a dhéanamh. Ina dhiaidh sin, is gnách go mbíonn tréimhse idirbheartaíochta idir an Roinn Gnóthaí Pobail, Comhionannais agus Gaeltachta agus an comhlacht poiblí sula mbíonn an scéim aontaithe. Ní thagann an scéim féin i bhfeidhm nó go mbíonn sí daingnithe ag an Aire.

Déantar cur síos sa scéim ar na seirbhísí a bheartaíonn an comhlacht poiblí a sholáthar:

- trí Ghaeilge amháin
- trí Bhéarla amháin nó
- go dátheangach.

Freisin is gá go ndéanfaí sonrú ar na céimeanna atá i gceist ag an gcomhlacht poiblí a ghlacadh chun na seirbhísí atá luaite a chur ar fáil i nGaeilge nó go dátheangach.

Tá sé de cheart ag an Aire ag aon am agus tráth nach déanaí ná 6 mhí sula rachaidh scéim in éag, treoir a thabhairt don chomhlacht poiblí athbhreithniú a dhéanamh ar an scéim reatha agus dréachtscéim úr a ullmhú.

Riachtanais maidir le hullmhú Scéim Teanga

- (1) Fógra a fhoilsiú ag lorg ionchuir ó pháirtithe leasmhara
- (2) Aird a thabhairt ar threoirlínte na Roinne Gnóthaí Pobail, Comhionannais agus Gaeltachta
- (3) Cinntiú go bhfuil líon leordhóthanach foirme in ann seirbhís a sholáthar trí Ghaeilge nó go dátheangach
- (4) Cinntiú go bhfreastalófar ar na riachtanais áirithe Gaeilge a bhaineann le seirbhísí a sholáthar i limistéir Ghaeltachta
- (5) Cinntiú go mbeidh an Ghaeilge ina teanga oibre ina chuid oifigí sa Ghaeltacht tráth nach déanaí ná cibé dáta a chinnfidh an comhlacht poiblí le toiliú an Aire

Ghnóthaí Pobail, Comhionannais agus Gaeltachta

- (6) Laistigh den tréimhse ama atá sonraithe san fhógra a foilsíodh, dréachtscéim a ullmhú agus a thíolacadh don Aire Gnóthaí Pobail, Comhionannais agus Gaeltachta lena daingniú

[Ar ais](#)

3. Cé mhéad scéim teanga a bhí daingnithe ag deireadh 2009?

Bhí 100 scéim teanga ar fad daingnithe faoi dheireadh 2009, a chuimsigh móriomlán de 181 comhlacht poiblí ó achtaíodh an reachtaíocht.

Ag deireadh na bliana 2009, bhí 79 dréachtscéim a raibh an próiseas comhaontaithe agus daingnithe fós le críochnú ina leith. Bhain 31 acu seo le hiarratas ar chomhlachtaí poiblí an chéad dréachtscéim teanga a ullmhú agus bhain 48 le hiarratais ar ullmhú an dara dréachtscéim.

[Ar ais](#)

4. Cá bhfuil eolas ar fáil faoi na scéimeanna teanga?

Tá cóipeanna de na scéimeanna teanga atá daingnithe go dtí seo le fáil ar www.coimisineir.ie/sceimeanna.

Chun cuidiú le comhlachtaí poiblí agus iad i mbun scéim teanga a ullmhú, tá treoirlínte reachtúla réitithe ag an Roinn Gnóthaí Pobail, Comhionannais agus Gaeltachta agus tá siad ar fáil ar www.coimisineir.ie/sceimeanna.

Tá liosta de chomhlachtaí poiblí a bhfuil iarrtha orthu dréachtscéim a ullmhú le fáil ar www.coimisineir.ie/comhlachtaipoibli chomh maith.

[Ar ais](#)